

四庫全書

集部

欽定四庫全書

東澗集卷十二

宋 許應龍 撰

啟

通安撫葉尚書啟

校藝文闡荐出鴻造甄陶之下效官泮水獲居虎節按  
臨之中輒斂版以趨庭敬齋心而奏記恭惟某官英姿  
山立典學海涵倒三峽之詞源經天緯地散一襟之和  
氣與物為春巍科密邇於鰲頭澗步徑登於鵞列久居

言路凜著直聲搏擊何心聳橫秋之鵬鷃姦邪褫魄無  
當道之豺狼九重深念其孤忠八座遂膺於峻擢上星  
辰而聽履獨高紫橐之班作舟楫以濟川實切蒼生之  
望暫分制閭殊鬱壯猷然觀施設之間已寓經綸之業  
謙和下士平易近民薄賦輕徭春生田里發姦摘伏影  
滅寇攘軍戎懷畏愛之心胥吏絕欺謾之弊提封一道  
謠頌同聲朝廷深知弱翁行將大用天子不見賈誼佇  
卽召還某燈火寒生簪纓未緒託身黌舍偶叨再薦之

書射策彤墀濫廁七人之列拊已每慙於樸學疲精妄習於詞科方虞刻楮之未成忽報戍瓜之已及欲使國人皆有式深慮未能大庇寒士俱歡顏敢祈垂軫

通楊帥啟

恭審渙膺宸綽榮鎮帥藩十國為連孰不仰郎官之宿五月報政已頓回閩嶠之春睿眷彌隆輿情胥懌恭惟某官家傳與學天賦異才見義必為不吐茹於剛柔之勢秉心無兢寧諂瀆乎上下之交氣節見於立朝聲名

長於治郡迨臨方面益著恩威雖召節沓來乃欲急流而勇退然凝旒圖任未容袖手以旁觀始借重於郎闈復升華於帥閫發姦摘伏影滅冠攘已責寬租川流惠澤禁戢刻木之擾杜絕珥筆之風蒐練惰兵尊禮賢士雖一方之幸甚如四海之望何母以我公歸兮方切民心之愛會有為王言者即觀禁路之登某雖忝塵氓屬拘職守燕賀僅憑於尺牘魚封忽拜於瑰詞清德凜然豈待奉一盂之水休聲藉甚但當賡五袴之謠

通鄒守啟

分符剖竹久宣千里之威聲在泮采芹幸託二天之巨庇將趨庭而伏謁先削牘以投誠恭惟某官忠烈名家清朝偉器詞章甚麗要皆原本於六經風致雖高不廢應酬於庶務自摘髭於上第旋振跡於亨衢錯節盤根牛刀荐試題輿別駕驥足難淹果由奏課之優徑任牧民之寄從臣交薦合登紫闥以通班宸命渙頒復擁朱轡而出守兩朞報政一意為民薄斂省刑春生田里深

溝固壘影滅寇攘為善無近名之嫌律已藹真清之譽  
類非俗吏為也佇膺丹詔之褒其以我公歸兮即聽黃  
麻之拜某三山末緒六稔上庠季攷月書荐玷文闈之  
首寸量銖較將幾舍選之陞遇連預於薦書獲浪登於  
甲第式遵銓格猥注儒官適瓜戍之及期奉萱闈而祇  
役青青子佩冀悉為鄭校之遊噦噦鸞聲尤願覩魯侯  
之戾

到任通運使啟

建臺分閫總司一道之權剖竹分符幸託二天之庇已  
諧視篆敢後通名恭惟經略運使賀白才華間平風度  
英姿山立望之儼即之溫厚德天成簡而廉寬而栗方  
入登於朝路旋出駕於題輿報政侯藩休聲藉甚提綱  
鑿船清節凜然遂膺簡注之隆晉任將輸之寄六轡如  
組方賴咨諏十國為連復兼鎮撫內振揚於風采外銷  
弭於寇攘遵海而南難久淹於英傑自天而下即榮拜  
於宸綸某再入修門六叨清選職閒事簡慙廩稍之空



糜幼學壯行曾分毫之莫展荐求外補期效微勞式過  
其行濫忝熊轡之駕未知攸濟深虞鼠技之窮所幸逢  
膚使之賢必不替昔時之眷奉法循理詎敢恃於私恩  
激濁揚清願曲垂於精鑒瞻依深切敷述奚殫

通交代李教授啟

漢庭射策濫踵英名魯泮采芹復承高躅竄謂蚩緣之  
幸倍深欣躍之私望履非遙馳書敢後恭惟交代某官  
清標絕俗勁氣邁倫文富波瀾瀉灑瀕瞿塘於筆下學

該流略吞石渠東觀於胷中粵自妙齡寔騰雋譽真而  
後發期收功於一戰之間巍乎有成果擢第於七人之  
列將升華於鼇禁姑寄徑於鱣堂崇雅黜浮詞章復古  
修舊起廢矩矱鼎新既休譽之藹聞宜諸公之交薦躋  
躋媚學豈容挽而留之衮衮登臺斯可拱而俟耳令學  
者有所統一深愧非才儻舊政必以告新願安承教

回交代王寺丞啟

入登朝列久叨附驥之榮出守侯藩復忝續貂之幸方

借修於菲削迺荐辱於華緘荷意勤拳拊躬悚惕恭惟  
交代知郡寺丞意誠心正學廣聞多言則成文得典雅  
渾深之體施之有政諱慈祥豈弟之聲自奏最於花城  
即近光於楓禁迨丞外府實階清切之班勇退急流翻  
任藩宣之寄以儒術而飾吏有善教以得民使無訟乎  
祇有片言之折築斯城也嚴為外患之防遂令蠻煙瘴  
雨之鄉如在和氣春風之域盍膺選表胡遽丐閑無以  
我公歸兮咸起攀轅之意會有為王言者即膺持橐之

除某久玷郎闈濫叨郡寄雖有上冢過家之便慙無承  
流宣化之能瞻之在前幸成規之可繼瞠乎其後恐高  
跼之難追然惟眷之素隆諒舊政之必告會言近止豈  
惟交賓主之歡竊有請焉願永篤子孫之契中丹所懇  
子墨奚殫

通徐判官啟

依綠水以泛蓮久勤瞻邈在泮宮而采藻行託帡幪望  
履非遙馳書敢後恭惟某官風規高秀德宇粹夷紬繹

六經推明上世之絕學度越兩漢追還先秦之古文遂  
登天梯如拾地芥胡久淹於雋軌尚叶贊於侯藩藹然  
謠頌之交騰皆謂廉明而有守空馬羣於冀北雖足為  
幕下之光飛鳳詔於日邊行即奉席前之對某三山末  
緒六稔上庠偶進預於薦書獲濫塵於甲第式循銓格  
猥注儒官不知慮此反教人恐未免先生之笑必有師  
焉擇其善何幸從賢者之游

回判官啟

泛紅依綠將資妙畫之長配白婉青首辱長牋之貺輝  
煌溢目悚感交懷恭惟判官從橐名門鄉評重望寬而  
有制用為蒞事之方直哉惟清益厲律身之操自參上  
幕藹著休聲空冀北之羣難久淹於逸駕飛日邊之詔  
當直上於華塗某久玷郎闥濫叨郡寄如是利如是害  
固欲周知將有為將有行尚祈協贊傾依彌切敷述奚  
殫

代通郭帥啟

一行作吏濫叨三尺之司十國為連行托二天之庇敢  
馳牘尺敬掣齋鈴恭惟某官勁氣橫秋精忠貫日夷夏  
畏慕載宣元振之威聲神明扶持獨著汾陽之高節久  
司戎閫進陟殿巖叶將相以交懽為國家而定策機謀  
密運煥五龍夾日之光宗社再安壯一柱擎天之力暨  
論勲而肆賞恨無官之可酬王言大哉顯奉制麻之寵  
相尊等耳榮參台鼎之間不專寵利成功之居乃徇明  
哲保身之道懇辭兵柄出鎮邊陲眷維揚之雄藩實難

兄之故部甘棠勿剪尚餘去後之思華萼相輝復見光  
前之政會有為王言者其以我公歸兮申以丹書冠一  
十八侯之位次光於皇祖校二十四考之中書某斥鷃  
卑棲蠹魚末學叨塵一第荏苒歷年甘心曹掾之卑屈  
指戍期之及著為律疏為令敢萌出入之思矜其短庇  
其愚尚賴憐憫之賜

丐外啟

猥以鴛庸濫塵鴛列侵尋一紀絕無毫髮之功僥冒九



遽盡出甄陶之賜入館已幾於六稔攝郎將及於五暮  
靜言思之實踰所望不啻足矣尚復何求第慙未報於  
恩門遂欲少親于民事非為私計期效微勞雖大造曲  
成尚閔允俞之命然周行久玷恐乖進退之宜矧屈指  
於同寅悲接踵而補外獨留於此豈能免希覬之疑苟  
居之安是自速顛隳之咎所合力求於更迭詎容久戀  
於寵榮竊有請焉不憚至三而至再與其退也庶幾成  
始以成終

代上憲使啟

合浮圖之失欲借一舉手之力仰使者之節輒伸三上  
書之誠願霽霜威少垂電矚竊以進身之路實資改秩  
之章求則得之寧免俛眉而伸睫多為貴者庶幾積土  
以成山至若職司之員又非他削之比儻或未遂猶小  
車無軌何以行之既獲所圖是掘井及泉不為棄也矧  
迫垂成之際敢嫌冒進之求伏念某褊智淺能薄才綿  
力幼而有志若稽田既勤敷菑長也無庸懼析薪不克

負荷雖玷名於薦墨莫繼踵於詞科庀職尉曹充員郡  
幕小大之獄不能察猥叨糾掾之司東西之命惟所之  
敢憚遐陬之阻實歷已更於六考判章僅獲於數員因  
而成之正賴中流一楫之助無可棲者不勝遶木三匝  
之思幸遇大賢主盟善類雖菲葑而亦采植桃李於無  
言苟不投誠殆幾自棄恭惟提刑人物冠冕朝廷羽儀  
極翰墨之工粹然得作者之體屏膏梁之習滿然有高  
士之風方參宥府之編摩翻任專城之委割嘉乃丕績

錫以使軺頓令蠻煙瘴雨之鄉盡在和氣春風之域詔  
且至矣公少須之將使萬物各遂其宜豈有一夫不被  
其澤生我者成我者已遂依歸求之與與之與願希袂  
九

代上諫坡啟

程能較藝曩嘗叨藻鑑之知嗟枯吹生今願借洪鈞之  
轉士固伸于知己書不足以盡言仰瀆威尊俯深震悸  
竊觀昔人之所薦類多平日之素知非求之故吏之中

則取之門生之列蓋聽其言觀其行已極精詳故後其  
源既其根力加成就此實大賢之高見豈期嘉會之適  
逢倘不布其心腹之誠是自棄於爐錘之外伏念某衣  
常短褐家本衡門退而學詩敬佩鯉庭之訓幸而獲選  
遂隨鶚薦之飛科偶玷於奉常職濫陪于漕屬盡瘁雖  
更於初考剡薦未獲於一章靜言思之當賴先容之助  
病不求耳孰為借譽之階幸遇正人進登言路雖菲葑  
而亦采植桃李于無言矧是散材曾蒙大冶載色載笑

每勤眊昧之私成始成終諒軫提撕之念暖律倘吹於  
寒谷弊帚亦享于千金恭惟某官直節冰清英姿玉立  
散一襟之和氣與物為春倒三峽之詞源決科發策巍  
亞黿頭之選晉升騎省之華直筆正繩震肅百僚之上  
引裾及雷激昂萬乘之前將大庇天下之寒儒豈獨遺  
恩閔之舊物月華先得幸依近水之樓臺雲屐不棲更  
傍誰家之門戶

代同舍上趙臨安啟

侍坐於先生長者夙有夤緣借勢於王公大人不無覬望敢憑尺素少布寸丹恭惟某官毓秀金枝凝祥寶祐與時酬酢萬變不窮遇事精明百蠹俱剔出則任鎮撫澄清之職入則居論思獻納之班帝曰識公上星辰而聽履人期柄國作舟楫以濟川胡為丹詔之新頒尚襲青氈之舊物蓋以輦轂之下難乎師帥之良前有趙張後有三王未見可傳而可繼遠者年歲近者數月誰能至再以至三倘非明公孰任茲寄不惟豪猾屏迹于秋

霜烈日之下抑使善良被化于春風和氣之中雖云善  
政之藹聞其如公論之尚鬱佇膺爰立式副具瞻伏念  
某少也畸人長而獨學抱遺經而究終始僉謂拘儒搏  
扶搖而溘風埃未酬壯志濫登黌舍竊慕英流患不精  
弗患不明敢替春誦夏絃之業有所譽必有所試冀躋  
月書季考之優每願事大夫之賢庶幾就有道而正曩  
恃伯氏文昌之契荐瞻泰山北斗之光姑蘇辱設醴之  
勤京邑沐還贄之寵感德至矣揣分茫然裁書敬控于



謝悰惠顧尚期於大造矧方庇天下之士豈獨拒互鄉之童暖律倘吹散帚增重口將言足將進三及門而喘焉力可為器可使一舉手之勞耳

代陳情啟

掃門擁篲過蒙三吐哺三握髮之勤奏記陳篇願效一舉手一投足之力俯慙僭躡倍切凌兢竊惟大臣之事君每以薦賢而為念廣萬間而庇寒士俱使懽顏適千里者喜似人尤勤推轂故嚴助則有邑子之薦而祐甫則

多故人之除蓋維桑與梓猶貴必恭豈連茹拔茅或忘  
引類幸此風之復見撫小己以自欣伏念某少也畸人  
長而獨學碌碌恨無於奇節兀兀敢替於窮年誦詩三  
百奚以為荐綴橫秋之鶚得水尺寸僅自致免為黜額  
之魚注選銓曹備員漕屬視事已更於初考刺章未獲  
於一員搖尾乞憐素昧獻諛之態炙手可熱恨無借勢  
之階茲逢節鉞之重臣喜接粉榆之後進成小成大默  
運洪鈞為楠為桷舉無棄物有此黃緣之幸敢伸悃悃

之私倘借重言俾沐繡衣之薦庶幾陋質頓增華袞之  
榮恭惟某官識洞幾深資兼文武澄不清撓不濁望之  
儼即之溫當征鴻橫海之秋嘗陪羽翼及飛龍在天之  
日復會風雲殫上閣之忠勤肅清朝之班列厥績用懋  
其報伊何王言大哉亟畀植纛建旄之寵相尊等耳行  
膺分茅裂土之封將使萬物各遂其宜豈有一夫不被  
其澤月華先得幸依近水之樓臺雲厦不栖更傍誰家  
之門戶

上丞相啟

十載居中愧久妨於賢路三章丐外期少效於民庸尚  
閔俞音敢伸前悃伏念某才疎識淺援寡勢孤侯津終  
更初蔑片言之薦相門晉謁遽蒙大造之知故府奉常  
成均中祕凡九叨於清職復兩攝於銓曹退省其私奚  
功至此欲報之德何日忘之遂興更迭之思荐瀆威尊  
之聽冀殫駕技仰答鴻恩有命自天未蒙從欲玩歲愒  
日深切汗顏苟不明進退之宜是自取顛隳之悔可以

去矣敢復戀於寵榮竊有請焉願亟垂於矜允恭惟某  
官忠貫日月勲塞乾坤熙載奮庸輔贊彌縫而藏諸用  
量能授職又負偃植各安所施矧久沐於陶成輒僭求  
於器使多多益辦雖無撥煩治劇之才碌碌亡奇第守  
學道愛民之訓倘辱取長而舍短或能趨事以赴功不  
達時宜肯效俗儒之癖具宣德意當希循吏之風以此  
存心用酬知己

回知縣啟

維桑與梓久矣親仁剖竹分符茲焉聯事方欲馳於竿  
牘乃先辱於華緘恭惟知縣雅量恢洪英標峻整仁必  
有勇既險阻之備嘗賞以酬勞盍軒騰而直上胡淹雲  
翼小試雷封翕然謠頌之交騰皆謂公勤而不擾佇膺  
芝檢入覲楓宸某久玷郎闈濫膺郡寄奉法循理固欲  
令田里之安學道愛人尤願廣絃歌之化

回教授啟

采芹泮水暫屈名流剖竹偏城幸聯王事方欲馳於竿

牘迺先辱於絨滕恭惟教授掉鞅文闡蜚聲含選胸中  
根葉高凌鐵幹之百圍筆下波瀾倒瀉銀河之千丈遂  
題名於鴈塔即分教於鱸堂媚學躑躑方賴範模之正  
諸公衮衮佇陪臺閣之登某久玷郎闥濫叨郡寄化民  
成俗必由學敢後崇儒溫故知新可為師願安承教

回學職啟

論秀而升諸學久聆令譽之馳思泮而采其芹行獲英  
游之奉方圖修敬遽辱貽絨恭惟某官博古通今弼中

彪外友一國之善士切磋琢磨倒三峽之詞源泓涵演  
述豹斑略露鶚薦已登矧益精素學之修豈難復青氈  
之舊槐花屆候雖暫隨舉子之忙桂籍書名當不在羣  
英之後某瞻依伊邇欣躍彌深範不範模不模深負好  
為之愧聞未聞見未見尚資忠告之規

又

一鄉之善雖久服於英名千里而遙恨未瞻於丰範敢  
期承乏獲遂從游恭惟某官行著月評文窺天巧窮經



學古淵源極深造之功藏器待時學校豈久淹之地矧  
槐花之候應而楊葉之藝精有司豈枉我哉更期賈勇  
一第特溷子耳佇聽成名某濫典芹宮適當瓜戍恨修  
辭之不敏荷惠問之相先溫故知新可為師自愧見聞  
之陋入學鼓篋孫其業正資剗切之規

又

矯首鄭公之鄉久欽令聞分教魯侯之泮獲奉英游慙  
班記之未遑荷飛緘之先辱恭惟某官風規高秀德宇

粹夷學博而宏袞袞湧泉之思賦麗以則鏗鏗擲地之  
聲雖身居庠序之間而志在雲霄之上學者審是而已  
既精楊葉之穿有司豈枉我哉佇見桂闈之擢某才無  
所取冗不見治論弗詭於聖人雖知自勉師不賢於弟  
子預切懷慙尚資胥訓胥誨之誠以廣寡見寡聞之陋  
回寄居官啟

千里而來方快景星之覩三揖而進遽蒙明月之投荷  
意殊勤拊顏有覲恭惟某官英才天賦盛德日新溢為

筆下之詞章出自胸中之機軸學優而仕預知遠業之  
難量名昭于師會見亨衢之直上某自慙疎陋過辱褒  
稱受言藏之當辨瓊瑤之報非敢後也實因朱墨之紛

回司法啟

宿聞高誼未諧覲德之私假守偏城行有同寅之幸貽  
書甚寵荷意殊勤恭惟司法學地淵深性天渾厚扶搖  
九萬里雖未迅於鵬圖才名三十年嘗奮飛於鶚薦巍  
中銓闈之選遂膺法掾之司公以無私當務三章之確

守鈍而後利庶觀大器之晚成某久玷郎闈濫叨郡寄  
推儒術以飾吏深慮迂疎以法令而為師正資明允

回任探花啟

冠帶億萬共推舍選之英聲禮樂三千果擢鼎魁之高  
第臚音甫唱興議交孚恭惟某官天與雋才家傳與學  
自出胸中之機軸溢為筆下之波瀾才華俱掇於儒科  
殆同五竇梓里雖多於文士莫齒諸任學校已馳二十  
年之聲議論宜出五百人之右指陳時政既仰勤乙夜

之觀喜動天顏遂擢寘三英之列盛名已震大用何疑  
某久矣從游茲焉快覩榮進素定固莫容頌禱之私事  
業相期願益厲端方之節輒因報貺少効贈言

回縣丞啟

鼓篋上庠曾覘庠表分符南土首辱魚封雖修問之尚  
稽喜同寅之伊邇恭惟縣丞蜚聲黌舍發藻儒林氣大  
以剛夙負摩雲之志賦麗以則載敬擲地之聲胡久鬱  
於長才尚為丞於茲邑先鈍後利當知大器之晚成右

挈左提會見公車之交薦某猥叨試郡行遂盍簪以臨  
其民欲尚廉平之政樂告以善更祈欣助之私



欽定四庫全書

東澗集卷十三

宋 許應龍 撰

論

民兵論

李抱真為懷澤潞觀察留後凡八年籍戶三丁擇一蠲其徭租給弓矢令閒日習射歲終大閱第其能否而賞罰之三年皆為精兵得二萬人既不廩於官而府庫實遂雄山東矣李德裕為鄭滑節度使徙劔南西川至則



率戶二百取一人使之習戰緩則農急則戰謂之雄邊子弟良以民兵可用勝如官兵蓋邊陲之民耳稔乎鉦鼓之聲目熟乎旌旂之容迫近敵境而間探素審從事鞍馬而弓矢素精因其所素習而教閱之亦其所樂趣者况又激之以犒賞孰不知勸兼屋廬妻子皆欲其保護其自衛之計尤切今為之糾合使之捍禦非特國之利亦民之利也故民兵之用尤為得力若夫出戍之兵雖給之生券而居非其鄉有思歸之念無勇戰之心驅

之使前雖不敢避然一聞少衄棄甲而潰尚何望其用  
命哉李抱真昭義步兵足以制山東之變李德裕雄邊  
子弟足以捍南詔之強其成效大驗蓋可攷也為今之  
計官兵固當激厲使之精銳而民兵尤宜糾集然區處  
民兵要必有法蠲其力役而使之安教以技擊而使之  
熟擇其精銳而重賞之則感激而思奮統以總率而督  
策之則緩急之足恃抑有所當察者出戰則民兵當其  
鋒勝捷則官軍爭其賞既無所獲誰肯効力是以雖有

民兵之名而未底安邊之績者其患實繇於此必於奏  
凱之際為之分別官軍有功則賞官軍民兵得勝則賞  
民兵所行既公其誰不服但州縣之吏尤當戒其侵擾  
使平時既失其心則警急曷望其助知此數弊為之處  
置則孰不樂為吾用比者官軍間有敗衄闕額未補若  
就沿邊招募於勢尤便蓋其人精強又習戰鬪使之戍  
守不惟省生券之費又且無調發之勞一舉而兩得實  
因時施宜之長策也惟在制閫者善為區處行見邊疆

固而國勢強矣

序

玉堂集序

文章經國之大業政化之黼黻其所繫蓋甚重也然辭  
尚體要不惟好異奏議宜雅書論宜理詩綺靡而頌炳  
蔚銘溫潤而箴頓挫其體固自不侔乃若制誥則又所  
以導達德意使萬民和悅而感戴言必洪雅辭必溫麗  
坦然明白不匿厥旨然後足以鼓動天下苟辭尚艱深

意或隱晦則何以使瘠老之夫扶杖而願觀武夫悍卒  
感泣而思奮哉翰苑之職昔人謂非文章不可為然居  
其選者最難其人必純厚明切如元稹體要典麗如裴  
度辭旨豐美得中和之氣如景先庶可追典誥之風而  
當絲綸之任少師陳公其有得於此乎學廣聞多才高  
識遠研精覃思於宏博之科一發中的絲是而膺玉堂  
之選作為詞章動合典則純乎若圭璧之無瑕鏗然如  
宮商之中節播告之辭則深切著明曲盡事情除拜之

制則溫潤典雅默寓規戒表疏宣答之類則其事實其  
意婉豐不餘而約不失今觀先皇帝踐阼之初發號施  
令固有不臧聳動一時之觀聽而丕應侯志者豈非斯  
文之力歟然文章特公之餘事耳蓋有德者必有言公  
外寬而內明氣和而心正修身踐行則中而不倚好賢  
樂善則休焉有容以一念之真誠結九重之簡眷可謂  
上不負天子下不負所學矣豈非盛德之至者乎故形  
諸著述粹然一出於正茲又有以見公之全美殆不止

於詞章而已吁德盛者其後必大端明元樞以興學雄  
文得雋詞科聯輝華萼而代言鼇禁復世其官使兩朝  
之號令文章前後輝映固足為北門之偉觀基命宥密  
協贊廟謨行將偃武修文以化天下功業日新少師益  
有光焉某竊窺傑作如獲拱璧不敢秘藏刊于鳳城俾  
廣其傳以為天下之模楷

文

到任勸諭文

當職被命來守是邦爰咨爰謀欲蘇民瘼冠攘甫息閭  
里粗安因時施宜盍先摩拊自初入境訟牒紛如猶未  
交龜豈應受理復慮冤抑無以自通徧取而觀因知疾  
苦撰造詞理誣害善良發擿陰私欺騙財物白詞追擾  
妄狀牽連凡此等詞十居四五此州風俗本自淳龐祇  
緣譁徒教唆煽惑黠胥猾吏並緣為姦逮繫誅求推肌  
剝髓含冤負屈寧免互調展轉相攻遂成健訟視事之  
始首當辨明一是一非平心予決痛懲妄訴姦慝自消



庶幾民風復歸忠厚尚期胥吏惟理是循訟不可長過  
無憚改清心省事樂詎可量外此弊端已知纖悉更須  
審訂以次施行心本無私政期盡善儻有便利尤所願  
聞

初至潮州勸農文

來爾父老聽太守言閩潮之邦土狹人稠田無不耕固  
不待勸潮之為郡土曠人稀地有遺利不容不勸被命  
此來首諏風俗竊知地多魚鹽民易為生力穡服田罕

務蓄積時和歲豐固無乏絕年或不登仰給循海比者  
隣封寇攘竊發適值荒歉穀價頓增近雖順成所積能  
幾盡廣墾闢使可耕之地悉為菑畲則粒米狼戾如抵  
如京雖有旱澇自無匱乏况禮義生於富足衣食既充  
盜賊自弭爾其更相教詔毋狠于鬪毋囂于訟安居樂  
業以成和順輯睦之風乃若黠胥姦吏害爾民者太守  
當痛懲之良法美意利爾民者太守當力行之况戢科  
需省徭役振困乏此太守之夙心也是究是圖冀復斯

語其母曰牆壁之虛文

次年勸農文

一夫不耕或受之饑農固所當勸奪其民時不得耕耨  
農尤不當擾此邦土曠人稀地有遺利勸相之方真不  
容緩然勸之意雖勤擾之害未革則莫遑安處欲耕得  
乎迺者視事之初穡事方興鄰寇繹騷輿論紛然欲鳩  
保伍爰咨爰謀恐妨農務第調禁卒控扼要衝迫近寇  
境始令糾合以助捍禦復罷科需蠲工役戢追擾懲誣

訴涓埃無撓俾一意耕墾迄用康年家給人足田里熙熙揆厥根源基於不擾今春和時重舉舊典勸課有文不復繁述太守當行恤民之政不替厥初爾民當思力穡之效圖惟厥終上下相安和氣召祥時雨時暘復如舊歲則進業日登其樂奚窮尚恐利有未興害有未除耳目之所不暨者毋憚來告當為審處期於便民今垂爭寢息訟獄頓稀豈教化能遽轉移蓋禮義生於富足更冀父老胥告胥訓申孝弟而修忠信以成和順輯睦

之風豈不休哉

代勸農文

閩嶠郡八鄣江介在一隅山叢水淺舟楫不通民所仰  
食不出郡境時和歲豐僅以不乏一或少歉旁郡穀粟  
釜鍾莫致細民艱食率多轉徙竊發之虞故此邦力田  
之務尤所當急比年薦登粒米狼戾稚耄按堵寇攘屏  
跡爾民亦既享力穡之利矣矧今風雨時若土膏脈起  
爾父老其帥子弟于耜舉趾是穠是蓁人力既至地利

必倍苟情農自安則滅裂之報雖悔何追今太守出郊躬行勸相爾民勿以為故事而聽之藐况太守蒞事以來禁遏囂訟蠲免宿逋胥吏蔑追呼之擾田里絕力役之勞是農時不奪而農力不困矣一意耕耨迄用康年使家給人足以修孝悌而興禮義顧不休哉

跋

學田跋

郡給田贍學學刻石以紀茲舊典也環峙森列歷歷可

稽捐私帑而置未有鄒侯若者侯屬意教育超軼今昔  
廼者捐金之始諄諄面諭以勸邸宇掠儼金不若菑畬  
之安且久地遙多逋土瘠易歎又戒以擇負郭膏腴市  
之深圖遠慮委曲詳盡茲不亦仁人之盛心庠序之殊  
遇乎今所殖者地邇而租豐亶可裨廩稍傳永久大書  
深刻俾青青子衿顧瞻咨嗟以無忘莫大之德易曰觀  
頤觀其所養自求口寔觀其自養盍亦自養以副所養  
則游泳其間者可無慙矣

又

捐閒田以贍學諸郡皆有別駕而為茲舉者林公之前  
未聞焉蓋公尊賢重士出於天性以兩科得雋薦典芹  
泮作成譽髦增羨廉給四明富沙交口稱頌今雖展驥  
治中於學校尤屬意尊先聖則飾簾易戟禮諸生則設  
醴餽金復因民請荒萊拘其租入屢以畀學青衿感戴  
請誌諸石某謂公贊貳此邦廉明平恕諸臺列剡去是  
而羽儀於天朝也不遠矣廣廈萬間將以庇天下寒士



俱歡顏豈但汀庠蒙賜而已

記

戶曹廳記

視漏不苴忽傾不夫居公宇者大概然也求其不洿不毀時葺時理者十不一二焉矧曰其有能畢力營葺不為已而為人如趙君之宅心宏大者乎戶曹廨宇始葺歲月漫不可考其重建則淳熙四禩也堂庭卑隘椽棟撓折上雨旁風無所障蓋其來久矣三衢趙君以妙齡

擢第來處茲宇休焉息焉而不以陋自厭獨念閱文史  
會僚寀不可無所於廳左隙地營一室扁以深容他悉  
未暇葺曰予得茲足矣既而郡侯鄒公剡奏于朝易寘  
推幕尋遷宏宇復喟然曰吾雖獲安於此而舊廳將圯  
不為更新繼至者何所休焉遂捐已俸市木石陶瓦甃  
計工役為費不貲郡邑聆而避之競揮金以佐用於是  
涓吉相方前指後畫謂昔門面北廳面西堂庖面東南  
委折顛倒不中準式乃撤亭鑿墉轉而南鄉規模宏敞

形體端直更舊門為櫺以便覽觀葺舊廳為亭以供燕  
娛工既訖集同寅而落焉酒酣或執爵而言曰昔叔孫  
所舍雖一日必葺其牆屋左氏持書以著厥美今趙君  
鼎新舊宇以惠後人其績尤彰彰焉而漫無紀述亶為  
缺典某謂此直君之餘事耳君智足以造謀才足以集  
事文足以飾吏而又輔之以端方沈厚之質憊心疲神  
密贊郡政凡有可以便安於人者行之剛果不俟終日  
其經畫締建宜如此其宏且敏也衆曰然請刻于石使

來者得以觀焉

漳浦橋記

南浦臨漳之巖邑也去邑郭五里黿峰瑞巖屹若對峙  
中橫鹿溪演迤泓涵往來病涉紹興間邑士楊造林正  
中始剏石梁閱歲滋久東傾西潰嘉定六禩竟圯於泮  
水寓公南安尉黃君克寬三山理掾陳君緯共謀重剏  
雖更迭宦游而解組來歸必拳拳疚心焉或拉耆艾捐  
金以倡始或命浮屠作偈以勸施銖積寸累前規後畫

以迄于成於溪之東改甃舊路五百丈以隔沮洳於橋  
之南肇建新亭三十楹以便憩息經始於甲戌之秋畢  
工於甲申之夏如虹斯垂如輦斯飛闔境耄倪顧瞻咨  
嗟願刻石以記適黃君造朝以予同登且嘗侍先君宰  
茲邑遂以見屬某曰偉哉君之是役也昔薛惠為彭城  
令橋梁不治薛宣知其不能今君里居乃能經營締創  
以為無窮之利行宰鉅邑必將推此以平其政民之被  
賜胡可既乎雖然是橋之建不特為山川奇觀而人才

之盛實係焉邑有舊識謂鹿溪平出公卿通人行狀元  
生昔人以鹿溪名橋意蓋取此後有易其名者自是人  
才湮鬱歲在癸酉黃君復以溪平名之是秋即有褒然  
為薦首者繼而橋成則與計者八擢巍第者二亭成則  
登鄉書者六捷禮闈者三皆向所未覩者雖識緯之言  
茫昧難信然事有適相符者是亦可異也已繼自今其  
益修人事以應之則異才輩出紛綸華耀當有以叶昔  
時之識又不但若是而止願相與勉之

繁昌縣學記

繁昌邑庠肇於慶厯迄今幾二百禩其地則始在縣治之南尋遷于東復遷于東北隅或因燼而初或因敝而脩比歲以來邑計窘匱遂不復葺三山王公來蒞茲邑首謁先聖循行學宮視其殿則傾東潰西視其堂則上雨旁風廊廡圯毀庭除榛蕪公嗟吁良久亟欲新之而宿逋溢萬無以為資葺年政成則用漸紓迺市木石迺陶瓦甃迺屬匠役倚周簿影董其事前設櫺星次植三

門旁置翼屋殿之間三堂之間五齋之間十有八至於  
庖廩亦罔不具環以垣墉凡百有十丈經始於乙卯之  
夏訖功於庚辰之秋宏敞峻潔頓改舊觀祀器尚缺復  
新剏制共糜米百石有奇錢一千一百緡有奇學廩素  
微贍給慮嗇復歲增緡錢四百米石百有二十俾青衿  
肄業其中月有書季有攷於是闔邑譽髦族觀聚歎願  
得文以誌諸石走介來請余謂僖公修泮詩有其歌文  
翁興學史有其贊郡國之大財豐而用足其力固易為



者猶使人詠歎無斁矧地儉于百里復承公私赤立之  
餘迺能經畫締紉其事為孔艱焉是烏可以無紀況今  
之為邑者苟以辦治聞則獻羨餘以希進飾庀傳以稱  
客否則以封殖其私留意於庠序者蓋罕焉今公舍彼  
為此不曰賢乎一宜記間有興學者又第飾美觀賈虛  
譽而教養不立今公乃豐其儲而課以藝或城闕無佻  
達之譏環佩獲漸摩之益二宜記邑之秀民不利於南  
宮數紀矣今是學甫建而登桂籍者即有人焉茅拔茹

連當自茲始三宜記至於修壇壝新倉庾葺杠梁表閭  
巷又特其餘功耳蓋公廉勤練密訟理而政平縣計既  
裕遂得以爲脩舊起廢之舉善最藹聞趣召不遠使嗣  
是者毋替其成又從而增益之則邑之蒙賜其可既乎

永和堤記

運河有塘衣帶淞水自帝都東北橋鎮薄吳頭楚尾縣  
亘千餘里關提封者六州帶主筦者十縣仁和首當其  
一郵遞輦運憧憧旁午惟永和堤阻鼎湖白龍潭之險

卯風湍流朝夕鼓蕩一有殘溜則膏腴數百頃瞬刻就浸欲經久不拔是豈一日一人之力哉邑有范任二君倡為義役乃悉心討究謂土力屢潰于成也於是率眾僦工築以石椿以松迄成二百五十丈為錢數千緡范君為費獨當什伍董視犒賚尤詳焉傍築道民庵給伏臘俾早晏巡徼事無疑慮整如也肇始於紹定己丑之春告成於是歲良月之望民間曾無勞動之苦公家坐收興築之利談何易哉堤成請記顛末余嘉其賢勞且

諗對曰自令之尹吾邑也無橫斂暴賦以蠹民繇是吏  
日貧而民日富既有餘財矣無深刑酷罰以殘民繇是  
役益簡而生益蕃既有餘力矣及今閒暇率就斯役用  
答令德故輸財而不知費盡瘁而不憚勞令不吾強也  
余亦欣然而思以謂總總而羣雖各有心其于望望  
未嘗不基於寬虐之政廉汙之操雖令不從與不賞而  
勸者抑豈無故哉今范令尹光世濟其美連躋科級以  
儒道字民澤最深矣始終不擾與民相安宜其一鄉之

善如范君學諭武任君學錄安世毅然以身任其責也  
吁佚道使民雖勞不怨凡領民社之寄者何獨不然豈  
真仁和之長獨擅其美永和之士勇於為義耶故書紹  
定庚寅陽月吉記

欽定四庫全書

東澗集卷十四

宋 許應龍 撰

帖子詞

皇帝閣春帖子

日向皇都永冰從太液融青陽纔轉律物物被和風  
寬大書方布歡聲四海同陽春如有脚造物不言功  
聖德乾坤大皇圖日月長遠人咸畏慕國勢寢安強  
金華綵勝年年巧栢酒椒盤歲歲新恭願吾皇千萬壽

四時無日不陽春

三白從來兆歲豐  
幾看瑞雪舞回風  
蒼龍掛闕農祥正  
擊壤行歌我稼同

東風昨夜掃氛埃  
四表咸欣壽域開  
都護已飛三捷奏  
凌煙同上萬年杯

皇后閤春帖子

一氣轉洪鈞  
陽和觸處新  
上林春更早  
草木已精神  
一歲兩逢春  
皇都景物新  
發生何處早  
甲拆驗莊椿

椒殿霞觴舉金花折勝鮮年年慶佳節眉壽祝綿延  
日融閨苑紅初露冰泮瑤池碧半涵管取新年多勝事  
當知風化自周南

臘前三白兆年豐即更彌旬雪滿空歲籥未經春已到  
從今物物被和風

貴妃閣春帖子

木德新回律瓊壺暖不冰舉頭聞鵲喜翔舞下觚稜  
月射璇題爛風傳玉漏清仰瞻雲漢表輝潤四星明



昨夜東風入律新  
朝來蕙露淨無塵  
玉觴椒酒陪歡宴  
總道今春勝舊春

賢哉淑德繼雞鳴  
密贊關雎美化行  
夙夜若為勤警戒  
始終一念欲相成

翠管銀罌舊事傳  
新春賸喜在新年  
巧裁綵勝迎佳節  
更祝君王壽萬千

皇帝閤端午帖子

卑服即康功  
君王儉德隆  
却頒羅與葛  
恩渥被羣工

內外期無患兢兢理萬幾延英勤講論遑恤汗沾衣  
清淨無他好歌風舞舜琴阜財并解慍總是愛民心  
離明赫赫正當中萬物咸欣長養風隴麥已登蠶又熟  
更多膏澤兆年豐

誕敷文德洽寰區赳赳明明運廟謨自是不爭應善勝  
何須更佩辟兵符

殿閣涼生晝景長翠煙縹渺御爐香經帷講罷看章疏  
至是猶聞食未遑

皇后閣端午帖子

玉切菖蒲細金包黍角香年年慶佳節燕衍侍君王  
寶篆煙輕繞瑤臺日正中等閑調玉瑟聊助舜琴風  
重午宮衣賜百工香羅疊雪葛含風誰知此日榮恩被  
端自稱絲效繭功

辟邪不用符為佩續命何須綵結絲逮下徽音繼樛木  
穰穰福履已來綏

三千玉女鬪羣芳並蓄兼收百藥良咸願東皇與西母

無窮眉壽等天長

貴妃閣端午帖子

擷秀闈羣芳兼收百藥良不因仁及物庶草曷蕃昌  
淑德儀宮闈天教受祉繁艾人暨桃印奚用更懸門  
丹篆釵符綵縷鮮承恩侍宴玉皇前一年一度為端午  
此去應須億萬年

裁成御服進君王霧縠雲綃疊雪香却效葛覃躬節用  
不忘澣濯舊衣裳

檻有榴花沿有蓮南薰拂拂晚涼天六宮莫度新翻曲  
只理雲和伴舜絃

詩

次韻張太博方得余所遺二程先生集辨二程  
戲邵子語

文字未科斗圖書未龜龍燦然天地間此理觸處逢是  
謂象之祖而為數之宗吳義古神聖先得人所同文因  
而繇之旦出亦並雄訖于我孔聖天命滋益恭渾然一

理貫密察而從容辭變于象占四者固所崇推時以知  
變象占在其中荒荒秦漢後學者昧所從不以災異會  
則以虛無通天開周氏子易道乃復東動靜靜復動終  
始始而終上承千年緒下起百世風同時有邵子講道  
于伊嵩天地之運化陰陽之無窮即物驗消長先機知  
吉凶邵子極道數獨立幾無我助也見詩注二程闡周孔為  
時開矇矇其歸則一耳昧者結忡忡學之將奈何矧余  
倍顓蒙要知羲皇心須踏周孔蹤

送天台李守

天台惟洛水平陸幾成淵經理閱再禩民瘼猶未痊將  
令田里安須得牧守賢疇咨能俾乂僉曰蓬萊仙君侯  
寬且明履節金石堅吏事素精敏公心無黨偏分符膺  
重寄為政將奚先租賦盡蠲減獄訟無淹延姦黠須禁  
戢阨窮當憫憐庶銷愁嘆聲播作謠頌傳使華聞有命  
丹書下日邊復使茲郡民鼓舞戴二天政成徹丹宸驛  
召歸甘泉嗟予十載間稠疊同班聯學館暨郎省昕夕

相周旋喜君駕朱轡恨我違英躔同寅舉餞觴佳句聯  
華賤枯腸強搜索綴緝僅成篇

送楊郎中守嘉興詩

君昨倅嘉禾施設皆儒者千里稱廉平六邑荷寬假海  
沂雖賴祥宣室俄思賈召還甫再朞出守榮五馬舊治  
聞重來懽呼溢田野正苦夏日炎將沐秋霖灑君侯寬  
且明義利審取舍願推一片心大作萬間厦苛斂戒分  
肥嚴刑去衣赭當令愁嘆聲轉作詩歌寫如君梁棟才



一麾寧久把祇虞席未溫又賦公歸雅

送人赴倉臺

帝念畿甸民財力俱有限俗吏肆貪殘侵漁蕩資產致  
治在得賢刺史尤當揀明公如范滂清節邁楊綰疏寵  
畀倉臺一道俱刮眼糴貴望公平斂苛冀公剴察吏貴  
精明臨民當敬簡高才固優為佇見鳩功儻將令愁嘆  
民喜至笑聲莞繡節暫馳驅玉堂資著譔行矣促公歸  
餞行聊舉盞

贈韓倅

鳳城久矣欽韓公華胄重來振祖風關決藩條明且恕  
待人接物春融融散為和氣徧南土雨順年豐民按堵  
海沂雖喜賴王祥驥足治中難久駐向來文惠倅瀛洲  
藉藉聲名動冕旒願君凌厲紹前美南澗事業當同休  
于今且慶生申旦敬爇瓣香祈鶴算中秋節近月嬋娟  
正好平分通夕宴君家自有舊瓊青合上星辰聽履聲  
明年此會知何處宣勸黃封下帝廷

贈林倅

元是清都紫府仙，出為名世應半千。  
發矢兩科俱中的，英名烜赫斗橫天。  
鄞水富沙典芹泮，黜浮崇雅文風煥。  
沙陽之政寬而明，吏不忍欺民不玩。  
雙飛鳧舄造皇州，三台八座俱挽留。  
辭榮避寵姑別駕，恬退高節前無儔。  
千里提封勤贊理，恕以待人嚴律已。  
一輪秋月照無私，百尺春潭清見底。  
須知作善天降祥，俾耆而艾壽而臧。  
萱闈朱顏映蒼鬢，詵詵蘭玉如鸞翔。  
匪伊丹詔日邊至，

策足烏臺陟端揆年年袞繡舞萊衣瑤池屢獻蟠桃瑞  
代上何樞密

宋元憲公王沂公妙齡擢第魁南宮清華歷徧陞諫省  
雍容二府亮天工却斂經綸來望郡一鎮天雄一鎮鄆  
政聲洋溢徹宸聰丹詔紫泥催入覲廟堂端委秉鈞衡  
致君堯舜風俗醇至今景祐皇祐治振蕩人耳如雷霆  
巍巍勲績誰能繼三嘆真賢生不世豈知今日元樞公  
矯翼天衢更凌厲禮闈得雋冠羣英旋登言路撓龍鱗

運籌帷幄參宥密翻私雨露澤全閩生平出處摠相契  
左揆尚虛天有意宣麻指日下彤廷整頓乾坤邁前美  
萱堂正富八十春綵衣輝映袞衣新二公榮貴雖同轍  
如此盛事真無倫先子姓名叨附驥况復團司同典記  
遺簪墮履儻未捐忠顧尚期逮孫子鯁生鼓篋趨賢關  
朔風急勁脩塗艱塊圮洪鈞轉一氣為借陽和先破寒

錢王郎中赴湖南倉

明明天子御丹宸首擇英賢將使指湖湘以南闕倉臺

環顧在廷誰足倚蓬山蘭省輟名流禮樂光華共心企  
看看六轡載馳驅爰度爰諏逮田里散財發廩蘇阨窮  
揚善舉賢律貪鄙弟恐崇臺未哭黔趣上亨衢詔泥紫  
與君同齒復同寅那更著庭紹英軌交情金石久並堅  
人雖漸遠心則邇衡陽鴈過可傳書時願劉公貼一紙

賀同知生辰

嘗陬之月如陽春君臣慶會應昌辰虹星牛渚將誕聖  
崧高維嶽先生申日角珠庭輝綠鬢仙風道骨真宣靖

才凌鐵幹四十圍量狹銀潢三萬頃端委樞庭贊化工  
制勝謀謨談笑中九苞告成村墅月一塵不警戍樓風  
勲名元是青氍舊衮衮名公誰出右黃麻听夕下彤廷  
玉帶貂蟬輝袞繡瞳矐瑞日上公槐宣勸黃封天上來  
賸喜千秋佳節近需雲復宴鳳凰臺福祿固知公自有  
不待占星問牛斗鰕生只備三千詩留取年年祝公壽

代上庠同舍上廷評

憶昔弱冠遊芹宮潁川先生振文風蹢躅媚學比如櫛

樞衣執經函丈中何人才識最奇偉惟公表裏珪璋粹  
學精姬公經國書賦飄司馬凌雲氣詞場價湧荐爭魁  
賜也何如敢望回一別星霜踰十閱側耳譽聲轟如雷  
翩翩薦鶚翔西淞一飛直上黃金闕排雲披腹呈琅玕  
蟾窟仙枝徑攀折枳棘難淹驚鳳栖金科得雋易如攜  
趨歸立拜廷評命青瑣黃扉指日躋屈指曩年同硯席  
五人已作龍門客鄉書蠻舍多有之碌碌未能著奇節  
著鞭無若祖生先策足要津儀班聯自笑塵蹤猶隱霧



拭目亨衢問天淵  
綈袍戀戀故人意  
墮履遺簪未捐棄  
不求而薦佩私恩  
高誼如公今有幾  
雖然前事已參差  
荷借鄒生律再吹  
苦無好語為公謝  
抖擻枯腸成此詩

鳳池立碑紀事

鳳翥龍驤欲表三山之奇傑  
龜蚨螭首載刊千佛之姓名  
雖云故事之流傳未若此時之  
烜赫臚傳星陞三魁同萃於一  
州喜動天顏四海喧騰於盛事  
凡遇榜中之選又皆天下

之英卿雲黼黻而游夏淵源歆向才華而孫  
吳韜畧比肩接武已增閭里之輝華博學宏  
詞尤聳紳綏之觀聽若是橫翔而捷出固宜  
深刻以大書維石巖巖益壯飛鷺之勝跡諸  
公衮衮佇聯振鷺之清班幸目竒觀率成長  
句

閱盡衣冠盛事圖三魁同郡古來無詞科得雋真鴻筆  
仙籍聯榮總鉅儒此日姓名輝石刻他年步武接天衢

浯溪更把元勳勒藉藉休聲震八區

贈鄭樞密

丘壑方將窈窕尋肯貪斗印耀黃金幾頒中宸留行詔  
莫返元樞勇退心紅旆分藩雖足樂丹誠戀闕自難禁  
浮雲出岫知無意祇恐蒼生望更深

拜賜宮花紀恩詩

濟濟蹌蹌藹縉紳祝堯均效華封人觴稱鳳闕懽聲沸  
花錫鸞枝內樣新露葉巧裁隋苑彩天葩先借漢宮春

舉頭仰戴君恩重好盡忠誠報紫宸

不用涼州羯鼓催陽和已逐小春來誰將萬點花間艷  
都向百官頭上開樣巧賸裁隋苑綵影搖斜蘸漢宮杯  
玉階再拜君恩重洋溢懽聲遍九垓

和權郡重九韻

鈴齋靜暇鎖棠陰幽壑何妨窈窕尋咳唾珠璣輝衆目  
錚鏦琴瑟樂賓心引杯非為黃花醉設席欣逢皂蓋臨  
來歲茱萸賜朝士看君鯨吸玉壺斟

和閩帥

龍飛天子攬英雄舊德欣逢泰道通  
丹詔果然頒北闕綵舟行矣駕東風  
雨餘杉徑新添綠暖入花粧旋姹紅  
待得湖邊春色滿我公已在鳳池中

新鑿南湖接海潮油幢領客泛蘭橈  
那知半夜雨聲急却放新晴物色饒  
盡日登臨陪步武高談灑落挹風標  
陽春白雪真難和泚筆惟書道路謠

和鄒守鹿鳴宴

賢守聲名重泰山肯將曲學誤儒冠相期素節終身履  
不道青雲得路難多士聯翩闔闔去忠言凌厲雪霜寒  
朱輜指日歸楓禁廷策煩公具眼看

館中和賞桂詩

喜陪盛集桂叢間擬賦新詩未敢先忽拜清篇真寡和  
難將拙語更爭妍枝頭爛漫黃金粟席上風流紫府僊  
凡骨豈容攀俊軌也沾賸馥醉花前

挽節使少保

一節忠勤紹祖風  
貂蟬七葉擅華宗  
版曹羨利巍遷秩  
強敵知名特斂容  
薦士半躋青瑣闥  
為民數奏皂囊封  
龍旂虎節今何在  
紀績還須仗蔡邕

袞衣赤舄我公歸  
共俟登庸翊政機  
楓禁荐頒天語渥  
薤歌我嘆露華晞  
真王未復青氍毹  
亞保空餘紫誥輝  
突兀麒麟圖繪處  
仰瞻遺像倍歔歔

挽李文昌

顯顯德望重朝廷  
況有胸中千萬兵  
蠻獠未擒宵旰慮

軺車一出笑談平囊封力沮和我議制閭咸推料敵精  
壯志未酬天不憖空餘草木識威名

盛名從古號難居公獨崢嶸四紀餘禁陞幾年聞曳履  
帥垣三度拜除書壽祺合享千齡永往事俄驚一夢如  
久矣辱知慚未報仰瞻丹旆倍欷歔

潘上舍父挽詩

狗苟蠅營笑俗情機心降盡倒風旌人生六袞不為夭  
家累千金能享成老去月評推吉德生前天爵謝虛榮



悲風瑟瑟飛丹旄行道歔歔亦失聲

蘭玉賢關雋譽飛詞場幾見捷音馳登雲將慰椿庭望  
陟岵俄驚薤露悲榮養痛嗟今日隔嘉封賴有異時追  
前岡已卜牛眠地螭首行鐫九尺碑

夫人黃氏挽詩

樞庭勇退古無前內助端由婦德賢煥館涼臺供燕樂  
衮衣綸翟慶聯翩雖云生死皆同歲猶恨徜徉未百年  
遙想銘旌搖曳處江山草木亦淒然

代同舍上郎中

人物依然呂洞賓  
冰霜風骨玉精神  
退朝花底千官散  
標格如公有幾人

能賦人人說潁川  
誰知妙訣已親傳  
詞場屢草干將句  
擲地金聲震九天

逸氣飄飄正妙年  
縱橫禮樂掃三千  
臚傳玉陛星辰曉  
姓字巍居鼎甲先

父子同時踐禁塗  
一門榮耀世間無  
願憑曹霸丹青筆

繪入衣冠盛事圖

冊府方羊冠列仙粉闥深處爛星躔黃扉已設屏風隔  
會見絲綸下日邊

題西巖寺

第一巖前風景殊山僧去後野雲孤歸來不費絲毫力  
幻出天宮一畫圖

修行極則到心安靜處忙中只一般談笑打開新鋪席  
此身元不離蒲團

自嘆

僕訴無衣婢訴飢老妻終日不開眉十年待得齊瓜熟  
又似齊瓜未熟時

薺菜

撥雪挑來葉轉青自刪自煮作杯羹寶堦香砌何曾識  
偏向寒門滿地生

